

KUMPUAN
RAM LEH HNAM
HUMHALH

YMA AW



CHANMARI WEST BRANCH YMA CHANCHINBU KAR TIN CHHUAK. VOL. XXIII. ISSUE NO.30 22th July, 2012

Chhandamna Camping buatsaih dawn

Chanmari West, July 22: Ni 10.7.2012 (Thawhlelni) khan Central YMA Committee room-ah CEC an meeting a, meeting hian kumin Kumpuan hmalakna atan Ruihhlo ngaite pualin Chhandamna Camping buatsaih a rel a, a hun leh hmun chu la rel fel leh tur a ni.

He meeting Pu T. Sangkunga President kaihhruaiah hian member 38 an kal a, YMA Day hman dan an thlir let a, branch hrang hrang ten YMA Day hlim tak leh hlut taka an hman theih avangin lawmthu an sawi a, Sawrkarin sawrkar chawlh a puan avangin tangkai taka hman a, pawl dangte pawhin he hunah hian programme dang lo siam lo se an duh a ni.

Kumpuan Ram leh Hnam humhalh bawhzui dan hrang hrang thlir a ni a, ruihhlo tih rem te, ruihhlo mamawh tihtlem te, ruihhlo ngaite puala Chhandamna camping buatsaih te, ILP nei lo leh ILP hman dik lo leh ILP pek dan dik lo titawp tura hmalak a, Group leh Branch huamchhung theuhah hemi

chungchang hi chak taka hmala tura ngen an ni.

PEMCOS dawr chu a kalphung dik lo nia hriat a nih vang a dawr lo tura Tuikual South Branch YMA ten an ven chu, thingpui in nan Rs 2000/- pek tur a tih a ni baw. Forest Department atanga Mat ply an dawn hmangin kuang (puitling 64 leh naupang 20) an siam chu Civil Hospital leh Synod Hospital-a ruang thawn chhuah tur harsatna tawkte tan pek a, heng kuangte hi Durtlang YMA leh Dawrpui YMA ten an buaipui tura hlan an ni.

Sport sub-Committee-in hun remchangah Marathon(M&W) leh Volley Ball (M & W) tan buatsaih tura an rawt pawh pawm a ni baw.

Thlanmual Sub-Committee

✂ Hun remchang hmasa berah Kuang duan hnatlang neih tum a ni a, memberte hun lo insiam lawk turin an inngen a ni.

✂ An member Pu K Lalrinmuana Champhaia, a nu damlohna avanga zin mek pawh tluang taka a rawn haw ngei an beisei a. A nu pawh a that chhuah leh thuai an duhsak hle.

✂ Thlanlaihna lamah tlangvalte tlawmngaih chhuah a, a tam thei ang ber thawk chhuak turin an inngen.

✂ An Vice Chairman Pu PC Lalawmawia'n Bawngkawnah whole-sale dawr a nei chu an lawmpui a, Kuang duang a hnatlangte Ui sa leisak a tum avangin Sub-Committee member-te an lawm hle baw.

✂ An member Pu C Zohmingliana pawh in sakna lamah a buai thei hle a, In a sak zawh vat theihna atan duhsakna an hlan a, In thar lawm turin an inring tawh hle baw.

ZOFA

✂ Ni 23.7.2012 (Thawhtanni) hian an member mi 10 te chuan Workshop on Song & Drama (North East) nei turin Guwuahati an pan a, tum ang chuan ni 26.7.2012 ah an lo let leh ang.

✂ Ni 24.7.2012 (Thawhlelni) zan dar 7:30 ah YMAZawlbukah lam zir leh tur a ni a, hruaitute kim taka kal turin an inhriattir.

KEIMAHNI

✂ Tunkar zirtawp zana hian Pasaltha Neuva Inah YMAAW chhut tum a ni a, thuchhuah tur nei chuan hemi hmunah hian thuchhuah tur pek mai tur a ni e.

✂ YMA AW chhutnaa min rawn tawiaawmtu zawng zawngte chungah lawmthu kan sawi a, lokal zel turin kan sawm e.

✂ YMA AW ah thuchhuah tur kan dawng thei reng a, a theih hram chuan pendrive-a inpek theih nise, a lawmawm khawp ang.

Branch News

✂ Tunkar Ni 24.7.2012 (Thawhlelni) zana hian Branch Executive Committee meeting tum a ni a, memberte lo inruahman tur a ni e.

✂ Branch Executive Member Pu Lalthuamluaia chu Middle School Headmaster a kaisangin Khawrihnim-ah a awm dawn a, kan lawmpuiin a hnathawhna turah tha taka a thawh zel theih nan duhsakna an hlan.

✂ Branch Finance Secretary Pu K. Darthantluanga chu kar kalta chhung khan an chhungte chhiat tawhna avangin Mualcheng leh Kawlkulh-ah a zin.

✂ Central road siamthat mek a ni a, tui mamawh ang ang petu Pu J. Johana leh Pu David Lalnunsangate chhungkaw chungah lawmthu an sawi.

✂ Chanmari Branch KTP huaihawtin Chanmari West Biak Ina crusade hman mek chu hlawk taka an hman zel theih nan duhsakna an hlan.

✂ Keifang quarry chimin Champhai night bus a delh a, thi chhungte leh hlaim zawng zawngte an tawhpui hle.

LUSUN KHAWHAR

Pu Zonunsanga Kum 53 H/o Darjeelingthangi 'N' Section chu Ni 18.7.2012 khan a boral a, khawhar chhungte Branch Committee chuan kan tawhpui hle.

PEM CHHUAK

1. Pu R. Lalnunmawia-te chhungkua chu Pu K. Lalramzauva 'V' Section te In atangin Luangmual-ah an pem.

2. Pu Lalremruata-te chhungkua chu Pu VL Chhunga 'T' Section te In atangin Thuampui-ah an pem.



TUNKAR CHANGVAWN

"Hengte pawh hi mi fing thusawi a ni, Rorelnaa mi zahzawng neih hi a tha lo.

Thufingte 24:23

Editorial Board

Editor:	J.Lalnangliana	9862399658
Joint Editor :	Lalchhandama	9862358347
News Editor :	Thangkhuma	9862303135
	R.Lalrinnggheta	9862358337
	Jacob Lalrinsanga	9612319779
Cir.Manager :	Johny Lalthanpuia	9612359161
	EVL. Hruaitluanga	9862655426
Production Manager :		
	R.Lalhmachhuana	9436151817

Branch Office Bearer

President	T. Ngurkhuma	9436190843
Vice President	R. Lalhmachhuana	9436151817
Secretary	RL. Thanhnuna	9436152760
Asst. Secretary	Zairemmawia	9862385654
Treasurer	C. Lalzarliana	9436142049
Fin.Secretary	K. Darthantluanga	9436196071
Adviser-te :	Pu Lalbiakthanga Khiantge	
	Pu Rothuama, Pi Zamanthangi	
	Pu Lalrengpuia Sailo	

Editorial :

Kumpulan ram leh hnam humhalh kawngah Central YMA chuan hma a la zel a, Branch YMA pawhin a theihna kawng kawngah a bawhzui bawka, hetiana a kal zel theih chuan kan ram leh hnamin hmasawna ropui tak a la chhar chhuak ngei ang.

Ram leh hnam humhalh kawngah hian tute emaw tihturah dah mai hi a awl a, mizo hnam zawng zawng mawhphurhna a ni tih kan hriat tlan a tha hle. Kan hnam tana tha tura pawl hrang hrang hmalakna pawh hi khai rual taka a kal theih a duhawm hle a ni. Kan mimal emaw chhungkaw nun emaw hausak leh nawmsak theihna tur a nih avanga hnam pawl sawi hi thil pawl rapthlak tak a nih theih avangin dik lo taka hlawkna lak tum hi a pawl hle a ni. Kan hming hawh tir khawpa hnam hralh pawh kan tih loh tawp tur a ni.

Zova Tochhawng 'Thawibawih' thuziak kan dawnga, hei hi **Hruaia VL** chanchin a ni hran lova, Thla a lawn hriatrengna pualin Apollo 11 chanchin Pu Tha- a zia hi a ngaihnawm, infiamna huangah sum a lo tam khawp mai, hming-thatna mai piah lamah hausakna a lo ni Chiang khawp mai, kan veng sport mite tan chona a ni.

2012 Thuvawn

*I awmdan tur chu
LALPA chungah ngat
la; Amah chu ring la,
aman a ti vek ang.*

Article :**THAIBAWIH**

-Zova Tochhawng

Mizoten Thaibawih kan tih, Sapin Henpeck an tih, Vaiin Joru Ka Gulam an tih, Kawlin nupui hlau an tih ve mai hi nupui te'n an duh duha an kawh kawi theih leh an thu hnuaia an dah theih pa ber sawina a nih chu kan hre tlang vek awm e. Ma'rawhchu, eng vanga Thaibawih nge an nih tih erawh Thaibawih lo leh a Thaibawih ate ngei pawhin an ngaihtuah zui ngai vak awm lo ve.

Thaibawih an awm chhan kawng hrang hrangte chu, (1) Nu zawk mi hausa fanu a nih vang emaw, an nupa leh an chhungkuain hmeichhe chhungte an pur chamchi vang, (2) Pa aia nuin sum leh pai a lak luh theih zawka kawng engkima a zei zawk leh chhungkaw mawhphurhna latu zawk a nih vang, (3) Nu ber chu chhungkuaa lal ber leh thu nei ber nih thlahlel mi a nih ve hrim hrim vang leh nu nasa tak a nih vang, (4) Pasal te lu bera nei loh leh zah thiam loh hi mahni mawng inhlamna mai a nih bakah chhungkaw lungualna leh zahawmna tichingpen vek thei a ni tih an hriat loh vang, (5) Pa ber chu mi tawng tam lo leh zaidam, mi thu ngaichang thei mi a nih vangte a ni ber thin a ni.

Thufing pakhatin 'Pa hlawhtling zawng zawng phenah thurawn petu hmeichhia an awm ziah thin' a tih hi a dik vek kher lo a nih pawhin a dik tlangpui thin a. Nu fing leh felte chuan an pasalte hmalakna kawng hrang hrangah ngaih dan tha leh fing an lo thawh ve mai bakah anmahni ngeiin hma an lak vena avangtein an chhungkua a lo changkangin an khawsak a nawm phah a. Pa ber chu tling lo leh kaihhrui ngai zawk pawh ni se, hmuhsit nan leh inlulin nan an hman phah kher ngai lo va, hmingthatna chu an pasal te an khumtir hlauh thin. Nu fing chuan hmingthat leh lansarh tum kher mah suh se, an felna chu tu'n an hai ngai lo va, fak leh ngaihsan an hlauh phah hlauh thin.

Hla phuah thiam Patea (Thavela tih anga lam) fapa, Thaibawih an tih fo thin chuan, 'Mipa tan nupui te ngam loh tak tak thu a awm lo. Tuk tha, ni tha hmuh kan duh avangin ngawih kan chuh mai mai thin a lawm.' a ti a ni awm e. Pa pakhat paw'n, 'Ka nupui ngam tur chuan tualthah ngam a ngai a sin' a ti e an ti bawk. Heta tanga Chiang taka lo lang ta chu, Thaibawih kan tihte hian an nupuite an hlau hrim hrim bik a ni lo va, an nupuite chu mahni thuduh leh luhlul, ancheh leh mawihawih dawn nachang hre lo, ka chauhva 'Hmeichhe lu chu mipa a ni.' tih ching mi an ni thin tih hi a ni.

Hmeichhiaten an cheng an man phawt chuan mipate hi bawng pachal

hnarhruil thil ang maiin an duhna lam lamah lungawi taka an hnuh kawi theih an ni deuh vek a. Tawngtheihna, tihluhna leh chungtlaknaa hneh an tum erawh chuan an duhnate tihlawhtling lui thei pawh ni se, anmahni chiah an lungawi a. Nupa lungualna leh hlimna erawh a chingpen zo va, pa ber thinlung chu pheikhawka lung te bun hnan ang hrimin a titohvin a khawhar ru reng thei thin a. Nu ber leh an chhungkua pawh miin an hmuh hniam phahin an nuihzat ru thin tih hi hmeichhe lungmawlte hriatthiam phak ngai loh a ni fan a. Tin, an pasal te Thaibawih an ni tih hi an pawm theih ngai loh a ni kumkhua bawk.

Hmeichhiate zia hi a mak dangdai ve hrim hrim a. Mi hausate ina mo nia lawi lut thenkhat chuan ka theih tak emaw tiin an thenrual leh hmelhriat hluite pawh hre tha duh lova hawi pir ta mai an awm fo va. Zaikhawmnaa hleihluak taka lam leh ninawm khawpa Haleluia pek ching te, concert-a zai thiam larte hmuh vanga thidanga an zawn chhuah vu vu thin te, inkhelhnaa te chel chul thin te hi hmeichhia an ni ziah thin a. Mawihawih dawn lo leh nunphung pangngai ramri pel rawka khawsak chin hi hmeichhiate zia ve reng reng a ni ti awm ta sela, tu nge hnial fithla thei teh lul ang le!

Nu finge erawh chuan pa ber duhzawng leh tuizawngte tihlawhtling hmasain an rilru an hminin an hneh hmasa te te a. Pa ber a tihlungawi tawh ber chuan eirawng bawl, thleng sil, chhuat nawh leh nau awm thlengin phur takin an thawk zel tawh mai thin a. Pa ber tiha mawi leh mawi lo erawh an thliar hransak thiam a. An ngaih dan leh duh dana thil kalpui zel chung siin pa ber chu lawm takin an siam thiam a. Pasal te tithangtlawm chuang hauh si lovin nupa inrem, chhungkaw tangrual, mite awh leh entawntlakah an chang hlauh thin a ni.

Kan sawi tak ang khan, Thaibawih awmna chhan bul chu hmeichhe mawl leh ancheh, pasalte aia lansarh leh chungnung zawk nih tum tlat thinte vang a ni zel a. Hmeichhiate hi thuhnuairawlh, inngaitlawm leh Pathiana tih tak tak mi ni vek sela zawng Thaibawih leh Thaibawih tih tawngkam hrim hrim pawh hi an lo piang hauh dawn lo a lo ni!

KHUANGCHERA

✂ Ni 19.7.2012 (Ninga) zan khan YMA Rûnah committee an thu a, thu pawimawh tak tak an rel.

✂ Ni 20.7.2012 (Inrinni) zing karah section sum tuaknan vawk an ser a, inhlawhna siamsaktu Pi Hmingi chungah leh a dawrtute chungah lawmthu an sawi.

✂ Section budget Rs 5000 leh YMA AW man an pe fel chu an lawm hle a, rim taka thawktu zawng zawngte chungah lawmthu an sawi..

✂ Doordarshan Kendra (Aizawl)ah Lengkhawm Zai khung tuma inbuatsaih a ni a, membrete thahnemngai taka hla zir thin turin an inhriattir.

✂ YMA hmalakna hrang hrangah section hruaitute'n hruaitu an nih ang ngei a, member-te tana entawn tlaka thahnemngai thin turin an infuih thar a. Tin, member-te pawh thahnemngai leh zual turin an inngan.

TAITESENA

✂ Kawngpui dunga motor dah thinte mi dang tana hnawh lo thei ang bera dah thin turin an ngen.

✂ Hun remchang hmasa berah Committee koh tum a ni.

✂ Section nula leh tlangvalte chhiatni/ thatniah tan la thar leh turin an inchah a, lumen ngai an awmin tlaivar tum lo kan nih chuan a hma lama kal tum thin turin an inngan.

✂ An Treasurer NI Lalthlamuanpuii phai lama zin pawh tluang tak leh dam taka alo haw leh ngei an beisei.

VANAPA

✂ Ni 21.7.2012 (Inrinni) zingkar khan Lung thiarin an inhlawh a, inhlawhna siamsaktu Pu PC Khawhminglianate chhungkaw chungah leh member hnattlanga thawk chhuakte chungah lawmthu an sawi.

✂ Pi Biakmawii w/o Pu Thlamkunga (L) damlo chu a that chhuah thuai an duhsak hle.

✂ Tui a harsat avangin section chhunga tui khur zawng zawngah insuk leh inbual khap tlat a ni.

✂ Section hruaitu leh member-te tun aia YMA hmalakna ngai pawimawh leh zual turin an inchah.

Lekhka ziaktu ropui tak takte ai mah hian, lekhka chhiartu ropui tak takte hi an awhawm zawk mah awm e. A rah an lo va, a chawm hahna an pumpelh hlah si.

Alexander Smith

NEUVA

✂ An member tlawmngai, Neuva Award pawh lo dawng tawh Pu Zonunsanga'n Ni 17/7/2012 a boralsan chu an ui hle a, a kal san tak a chhungte an tawrhpu hle.

✂ Local Council thuchhuak angin Zuang Tuikhur ah insuk, inbual, Motor sil te khap tlat a ni a, Tin, zan rei a tui pipe thin te ti tawh lo turin an hriattir.

✂ Section hruaitu leh member-te tun aia YMA hmalakna ngai pawimawh leh zual turin an inchah.

✂ Section huam chhung a Bawhlhlawh bawm lo paih fai thin tute chungah lawmthu an sawi.

✂ Doordarshan a inhlawhna hmuhsak a, a tul ang a hlawhte buaipuitu Pi Zodinpuui (Madin-i) chungah lawmthu an sawi.

✂ Hun remchang hmasa berah Committee koh tum a ni.

✂ Ni 21.7.2012 (Inrinni) zingkar khan Section huam chhungah Faina hnattlang YMA Chhangte nen neih a ni a, YMA member leh YMA Chhang member thawkchhuak zawng zawngte chungah lawmthu an sawi a. Chhung tinte mahni in leh a vel vawngfai chhunzawm zel turin an in chah.

✂ An hruaitu Pu John Lalfakzuala nupui Pi Chhuani damlo chu a dam thuai an duhsak.

APOLLO -11 hriatrengnan

VL Thakima Pautu

'Apollo-11 landed on the moon with the surprise to everyone on July 20, 1969. This was the first manned mission. There are still skeptics today that believe this was a hoax'. He thu hi Apollo-11 chanchin kan chhiar chuan kan hmu theuh awm e.

Tun tumah hian kum 1969-a mihring thlaa lawn kha tak tak a ni em? Rinhlelhawm a nihna leh intihderna a ni em? Tih lam hi kan thlir dawn lova, Apollo-11 a NASA mission tum ber chu thla a mihring ngei lawn a ni a, an tumna te tihlawhtlingin American Neil Armstrong leh Buzz Aldrin-ate chu **July 20, 1969 dar 20:18** khan an lawn/tum ta a ni. He thil thleng hi tun thleng hian khawvel mihring mak tih a hlawh a, a mak reng em tih hi kan thlir tur chu a ni.

Tun hma chuan Computer hardware hi khawh lianpui a siam a ni a, a khawh bunna ringawt pawh in lian tak an hmang hial a ni. Mihring thiamna alo sang a, dawhkan te tak tea hun mai theih chu sawi loh; lennaa ken mai theih Laptop an han siam leh a, fel si, kim si, te siin an in siamsiak hi a ni ta mai a nih hi! Mobile handset te pheih chu hum pil tham lek alo chhuak ta, keini ve zawng mi siamsa, kan mobile handset pawh a tangkaina tur anga kan hman thiam loh laiin a tawi zawngin han sawi ta ila; mihring siam an lo tum leh der tawh mai a, a mak tih loh rual a ni awm love. Mahse hengte hian min siamtu finzia leh ropuizia a tilang zual zel alo ni.

Bible-ah chuan Isua alo kal leh dawn tih a inziak a. A lo kal leh dawn a, khawvel awmdan tur pawh a sawi thlap a, heng thute hi khawvel mifingho hian an lo hre ve nge? Engtikah emaw chuan khawvel hi a chhe dawn tih hi

an ring ve tlat mai. Hei vang hian mithiamte chuan chumi hun a inven dan tur leh himna tur ngaihtuahin an hmanhlel a ni ber mai. Hetiang lam hawia Film siam pawh kan en tawh hlawm awm e. Arsi themin khawvel a den tur lo bawm darhte, van thengrenga Boruaklawng, mi engemawzat leng siamte, thlaa mihring lawn te bakah Sikeisen an la ti ta deuh deuh. Heng bakah hian khawvel piaha lamah mihring an awm em tih zawhna hian he lei a chhiat huna mihringte chenna tur zawhna lam a kawh lo thei lo a ni.

Isua Krista pian hma kum 400 B.C vel daih tawhah khan *'Mu angin, sang takah i bu chhep mah la, chumi atang chuan ka la thla tho vang che, tih hi Lalpa thu chhuak a ni'* (**Jeremia 49:16**) alo in ziaak daih tawh a. Pathian hian Van thengrengah emaw, thlaah emaw, sikeisenah emaw, tuifinriat mawngah emaw A mi siam mihringte hian chenna tur an la zawng dawn tih alo hre lawk daih tawh.

Thla a lawn kum 43-na, July ni 20, 2012 alo thlen hian thlaah meuh mihringte an lawn ta hian Pathian ropuizia a tilang thin a. Pathian hian khawvel chhiatna lak ata hi tumah him tur reng an awm lo tih min lo hrilh tawh a, kan Lalpa ngeiin *'Vanah lawn mahsela chuta ta chu ka hnuk thla ang'* (**Amosa 9:2**)-alo ti daih tawh a ni. Hengte hian engkim chunga thuneitu chu Pathian a ni tih a tilang chiangin mihring finna piaha lama roreltu leh thuneitu chu Pathian a ni tih a tilang chiang hle a ni. Hla siamtuin "Van sang leh Seol-lamahte, Pathian ramri khamna reng a awm lo" alo tih hi hriaiin, khawi hmunah pawh awm ila, Pathian hmuh loh reng a awm si lo.

YMA AW hi vengchhung chanchin thar hriatna hnar pawimawh tak a ni.

Olympics-a medal lak a hlawk

T-a

Infiamna kan ti rau rau a nih chuan heti zawng hian ngaihtuahna seng chhin ta ila; kan fate zingah an naupan laia infiamna lama talent nei an awm a nih chuan Olympic Games-a medal laktir tum khawpin kaihrui ta ila, a hlawhtling a nih ngat chuan a hlawk khawp ang.

Delhi-a chhungkaw harsa taka atanga chawr chhuak Sushil Kumar chuan mite fak hlawk khawpin a bei ngawrh a, tlangval tlawm leh rethei ve tak ni mah se a talent tipung zelin, 2008 Beijing Games-ah khan wrestling kg 66 freestyle-ah gold medal a chai chhuak.

A hmian infiammi beiseiawm tak a nih avangin Railway Ministry chuan Sushil hi la lutin thla tin a intunnunna khawp hlawn an pe. Beijing-a medal a lak rual hian Delhi naupang rethei ve tak ni thin khan thawk leh khatah Rs vaibelchhe 1.75 a dawng a, Railway chuan chief ticketing inspector-ah a kaisantir baw. Hei mai bakah Indian infiammite chawimawina sang ber Rajiv Gandhi Khel Ratna award hlan a ni.

Sushil hian tunlaia Mizo naupang tam takte neih ang nei pha lo mah se, a neih hlu tak talent tipung tura a beihna nasa tak avangin a damchhung ei a chai chhuak mai ni lovin, mi hausa kan tih huangah a inhlangkai. Inthlahdah mai lovin 2010 khan World Championship-ah gold medal a la zui a, Indian wrestler zinga he dinhmun luah hmasa ber niin Rs nuai 35 a hmuh belh bakah Railway-in Assistant Commercial Manager-ah a kaisantir baw.

Olympic Games-a tel phak ringawt pawh Indian tan chuan hmemhnampui tham a ni a, Mizo tlangval thakap thiam C Lalremsanga pawhin hamthatna tam tak a neih phah bakah, Sports Department-ah officer hna pek niin a damchhunga nuam taka a chhungte nena khawsak theihna tur a hmu.

Khawvel awmchhungin Olympic Games hi a awm reng ang; mihring pawh kan awm zel dawn a, fa kan nei zel ang a, tunah pawh eizawna harsa avangin mi tam tak kan buai a, kan fate zir nan kan neih zawng zawng sen kan hreh loh laiin kan beisei ang erawh thlen a har tial.

Mizo zingah tu mah Olympics medal la thei an la awm lo va, kan fate zingah talent nei tha kan nei a nih chuan Olympics thlir chung a tet lai atanga kaihrui theih a tha hle a, kan cho phak loh a ni bik lo. Sum tam tak an hui tur pia lamah khawvel hmaa India leh Mizoram chawimawi tur an ni a, eng kawng pawh ni se ram chawimawitu aia chhuanawm hi khawvel thlirnaah a awm thei lo. Khawvel hmaa hnam puanzar pawt phar a, khaisana awmtir thei tlem te zinga mi chu infiammite an ni a, chutih laiin mi zawng zawng erawh hemi kawng zawh tura tih chi an ni lo.

Kan tum ber chu fa puiting leh hlawhtling chher chhuah a ni a, lehkhazirnaa hlawhtling tak tak Mizo zingah tam tak an awm tawh, mahse, hnam dang ngaihsan theih leh ram pumin a chawimawi an vang a, an theihna avanga ram pum hriat hlawn phe chu sawi tur an tam lo chiang hle.

Badminton Club

Tunkar Ni 24-30 July 2012 chhunga Electric Veng YMA Hall-a badminton Competition neih turah Chanmari West badminton Club atangin Single-ah 1 leh Double pair 8 chhuah tum a ni.

BO CHHAR

1. Driving Licence chhar a ni a, a tibo chuan Tv Johnny-a (Phno. 9612359161) hnenah ngaihven theih
2. Sana (wrist watch) chhar a ni a, a tibo chuan phone no. 9612905015 ah a pian hmang dik tak sawiin ngaihven theih a ni e.

TI BO

Chanmari West Presbyterian Biak In leh YMA Park inkarah tarmit a frame dum tihbo a n i a, alo chhar chuan khawngaihtakin ph.no 9612631225 ah min hriattir thei ula a lawmawm ngawt ang.

Maliani, Hunthar Veng

Mi fang chuan a rilru chu darthlalang angin a hmang a. Engmah a chelh bet lova, engmah a dawng hnial baw lo. A dawngsawng a, a vawng reng chuang lo.

- Chuang Tse

*Thian tha tak nei lo chu million-
aire pawh ni se, a rethei a ni.*

- B.C. Forbes

C W S C

✎ MPL playoff khelh mekah theihtawp chhuaha tan lak zel a ni a, Adviser Pu Lalbiakthanga Khiangte, Commandant, 1st MAP in a hnena mamawh an thlen apiang a lo phalsak thin a, Pu H.Lalmuanpuia 'T' in Ball 2 a rawn leisak a, an chungah an lawm takzet a ni.

✎ ADFA hnuaiah 1st Division leh Aizawl East Zone-ah 3rd Division-ah registration tih mek a ni a, a hrechiang duh chuan Football Managing Board Secy Tv Zairemmawia 'N', Tv R. Lalringheta 'V' leh Tv Lalnunhlina 'V' te hnenah ngaihven theih a ni.

VOLLEYBALL MANAGING BOARD

✎ Ni 17.7.2012 khan Tv Vanlalruata 'T Sect' te inah Committee neih a ni.

✎ Remchang hmasa berah vengchhungah sangha zawrh tum a ni a, veng mipuite tlawmngaia lo leisak turin an ngen.

✎ Aug ni 14 atanga tan tur 1st Division Tournament khel turin ngawrh taka inbuatsaih mek a ni. Hemi atan hian Manager Tv Dr David Malsawmkima, Asst Manager Tv Vanlalruata, Coach Pu Laltnanmuana Asst Coach Pu Ropara te ruat an ni.

FIFA 2012 TOURNAMENT

Starting from 27.7.2012 (Dar 6:30p.m)

Venue : Blue Star Academy,
Bawngkawn.

Entry Fee : Rs.150/-

Prize.....

1st Rs.5,000/-

2nd Rs.3,000/-

3rd Rs.2,000/-

Contact :- 9612354968 /

9862303944

8974631204.

MAMA SHOE STORE

Discount Discount

5% - 50%

[Zion Street leh Millenium Centre 3rd Floor D - 73

[School shoe, Smart Shoe leh Sneaker] branded chi hrang hrang Ni 9.8.2012

[thlengin kan discount chur chur mai, min rawn dawr ve teh.

(2-2)

Mawia

Taitesena Section, Chanmari West